

أغنيتي

٤

obeikandi.com

obeikandi.com

## آدم وحنان (\*)

آدم هو

وهية حنان

شافوا جنتهم ف الإمكان

هم اتنين

حبيين

نبض القلب.. وضى العين

سحر عيونهم يحيى قلوب

وابتسامتهم تمحى ذنوب

لويوم لمسوا الصخر يدوب

هالين من ورا موج وبحار

واجهوا وعدوا صحرا ونار

آدم ضم الكون بحنان

ظهر الأخضر ف الألوان

والإنسان أصبح إنسان

همست باسم الحب حنان:

ضمنى.. حسسنى بوجودك

هات إيدك يصاحبنى خلودك

خد قلبى وياك ف صعودك

\*\*\*

آدم وحنان  
هم حكاية كل اثنين  
كانوا ضحكنا  
صباحوا دموعنا  
وبقوا ف عز الضلمة شموعنا  
\*\*\*

آدم هو  
وهيه حنان  
حلم الحب ف كل زمان

(\*) لحن: فاروق الشرنوبى . . غناء: ماجدة الرومى .  
من فيلم الآخر.. إخراج يوسف شاهين.

## سبحان الله

سبحان الله .. سبحانه .. من عشقى ومن فيضانه  
من بعد ضياع أيامى .. شوفت الإحساس قدامى  
وأخذنى الهوى ف طوفانه ..

سبحان الله ف آياته .. لما ييّن كراماته  
من بعد القلب ما يسكت .. إزاي رجعت دقاته  
إزاي يا سنين عطشانة .. رجعت للورد حياته  
والكون حَس بألوانه ..  
سبحان الله .. سبحانه ..

يا حبيبتى يا دنيا بحالها .. طيبة ف جميع أحوالها  
قربى بعيونك منى .. خلىنى أعيش ف جمالها  
قربى طبطبى على روحى .. خلى الأيام تحلالها  
والحب يعود لمكانه ..  
سبحان الله .. سبحانه ..

## ما بتحبيش

ما بتحبيش

وقلبك ف الضياع بيعيش  
يناديكي الهوى ماتجيش  
على لسانك كلام كذاب  
وف عينيكي أمل وسراب  
وصوتك أحلى م الكروان  
لكن قلبك ما بيغنيش

ما بتحبيش

قابلتك .. قوت مشتاقه  
وانا مليات بشوق محروم  
هانفتح للأمل طاقة  
وعمر الحب بينا يدوم  
لقيت حلمك مالوش عنوان  
وتايهة ف بحر ما يرسيش  
وصدرك أجمل الأحضان  
بيوعد بس ما بيوفيش  
وصوتك أحلى م الكروان  
لكن قلبك .. ما بيغنيش

يا جرحى ف الهوى .. حاسبى  
بدون حب .. الليالى جراح  
رحيلى هايبقى مش ذنبى  
وممين هايرجع اللى راح  
نغم روحى ولا الفيضان  
وإحساسى .. ما بيخونيش  
ونبض القلب فيه ألحان  
ومن غيرها لا يمكن اعيش  
وصوتك أحلى م الكروان  
لكن قلبك ما بيغنيش

## عاشق عيونك (\*)

عاشق عيونك .. وعيونك .. مش عارفانى  
وف قلبى .. لو تدرى بقلبى .. بحر أغانى  
يا حلوة يا ام شعور طيارة  
والنظرة مشتاقة ... وحايرة  
تاھت حروفى من خوفى .. وانتى أمانى

أھوى النسيم لما ينسّم .. على نغماتك  
وأحب نبضى المتقسم على خطواتك  
يام العيون بتداوى الآه  
لفيت وراكى بلاد الله  
تاھت حروفى من خوفى .. وانتى أمانى

لو شوفتى إيه اللى جوالى .. يوم ما رأيتك  
كان سحر عودك غنى لى .. لما ناديتك  
يام العيون بتداوى الآه  
لفيت وراكى بلاد الله  
تاھت حروفى من خوفى .. وانتى أمانى

(\*) لحن: فاروق الشرنوبى ..  
غناء: راغب علامة.

## نورى نور (\*)

نورى نور واهدمى سـ  
وسيلي شهد وندى وعطور  
يا أعلى موجة ف بحر الضى  
يا أحلى نسمة ف شمس الحى  
ما تواعدنيش على بكره الجى  
ليه النهاردة ييات مهدور

أشيل حمول الوقت حنين  
واعدى بيها زمن رواح  
وكل ثانية بعد سنين  
تولد فى قلبى ندا وجسراح  
واما التقيكى تقولى أكيد  
هانبتدى بكره المواعيد  
ونحصد الحلم المبدور  
يا أعلى موجة ف بحر الضى  
يا أحلى نسمة ف شمس الحى  
ماتواعدنيش على بكرة الجى  
ليه النهاردة ييات مهدور

لسه النهاردة صبح وليل  
وعصر فتنة ومغرب ضل  
مليان بوعد وسعد وميل  
وحضن شوق على صدرى يهل  
مدى أيدى اللقا فى الحال  
يكفانى فى غربتى ترحال  
وتوهة فى الزمن المغدور  
يا أعلى موجة ف بحر الضى  
يا أحلى نسمة ف شمس الحى  
ماتواعدنيش على بكرة الجى  
ليه النهاردة ييات مهدور

---

(\*) لحن: رياض الهمشرى .  
غناء: مدحت صالح.

---

## عاشق مجنون (\*)

أؤمرنى أطيع .. يا ابو حـضـن وسـيـع  
والنور بيـهـل .. من التـقـطـاطـيع  
أؤمرنى أكون .. عاشق مجنون  
وأعود لحنان المهـد رضىـع  
يا ابو حـضـن وسـيـع

حبك إخلاص .. من غير حراس  
ومادمت أمين .. على قلبى خلاص  
أؤمرنى أرفرف زى الفـجـر  
وأغنى بفرحة برغم الهـجـر  
أؤمرنى فى عز لقـانـا أضـيـع  
يا ابو حـضـن وسـيـع

يا ابو نظرة حنان .. مليانة أمان  
والعمر معاك .. من غير أحزان  
أؤمرنى أكون هادر كالسـيـل  
أو ناعم زى نسـيـم الـليـل  
أؤمرنى اطر حلك ألف ربيـع  
يا ابو حـضـن وسـيـع

(\*) لحن: رياض الهمشـرى ..

غناء: مدحت صالح.

## بنت الجيران

بنت الجيران كبرت فجأة .. فتحت بيبان قلبي برقة  
قولتلها عاشق .. بصتلى .. ماقاتش أبوه .. ولا لاه

كانت مع الصمت تعدى .. هية وفستانها الوردى  
دلوقتى كل ما بتهدى .. تسمع وراها ميت شهقة

ورد الحنان .. فيضان طارح .. والعود بقى غير امبارح  
سارح .. ومستقوى وجارح .. وكل حاجة فيه ناطقة

العود .. وأشواقه الحارة .. طاغى .. بأواجه الحرة  
مَسْرَة .. من بعد مسرة .. وكل ما تدور .. تلقى

كبرت .. وكبرت أسرارها .. وبقينا نسهر لسهرها  
والصبح نتمنى ظهورها .. والقلب يتعب م الفرقة

العين تسلم بحرارة .. وخطوتك ليه محتارة  
خايفة من الحب يا جارة .. ولا انتى مش لاقية الجارة

## غنى (\*)

تعمل إيه .. لما الأسوار.. تكبر.. تكبر من حواليك؟!  
تعمل إيه .. لما الأزهار.. ما تحلش الكون ف عينيك؟!  
واما البسمة تخاصم قلبك .. من غير حتى ما تعرف ليه  
تعمل إيه؟!!

أنا عن نفسى باقرب منى .. وأهمس همس كأنى باغنى  
فجأة ألاتى مشاعرى الصافية .. والقى الكون ويايا يغنى

البنّا بيبنى وبيغنى

والطير بيرفرف ويغنى

والموجة ف البحر تسافر

لو رجعت للشط تغنى

نور الحب مايعديش .. ناحية قلب ما ييغنيش  
واما الغنام القلب بيطلع .. زمن الخوف بيروح مايجيش

البنّا بيبنى وبيغنى

والطير بيرفرف ويغنى

والموجة ف البحر تسافر

لو رجعت للشط تغنى

(\*) لحن: حلمى بكر .

غناء: رحاب مطاوع.

فازت هذه الأغنية بجائزة أفضل كلمات وأفضل لحن فى مسابقة الأغنية العربية التى ينظمها اتحاد الإذاعات العربية.

## شمس بتشرق من جوايا

وفر كل قصايد شعرك .. أنا مش أحلى بنات حواء  
يمكن اكون فعلاف مشاعرك .. أجمل من كل الأضواء  
بس انا عايزة أعيش ف حكاية .. فيها الحب وسيلة وغاية  
شمس بتشرق من جوايا .. وتوصلنى لأعلى سماء

مش عايزة قصايد ف عيونى .. ورموشى الساحرة على جفونى  
هاتقابل يوم أجمل منهم .. وعيونك يومها هاينسونى  
يبقى الأجمل لنا ف هوانا  
إن الحب يعـيش ويانا  
شمس بتشرق من جوانا  
وتوصلنا لأعلى سماء  
وفر كل قصايد شعرك .. أنا مش أحلى بنات حواء

أى جمال هاىروح هاىروح .. واللى بتبقى حلاوة الروح  
هية اللى بتسعد أيامنا .. وبتقدر على أى جروح  
يبقى الأجمل لنا ف هوانا  
إن الحب يعـيش ويانا  
شمس بتشرق من جوانا  
وتوصلنا لأعلى سماء  
وفر كل قصايد شعرك .. أنا مش أحلى بنات حواء

(\*) لحن: شريف تاج .

غناء: لقاء سويدان .

## مش عايزة أمشى (\*)

مش عايزة أمشى  
أنا عايزة أسهر هنا ما انا مشى  
الحب لسنة ف قلبى دايم  
وليه يا قلبى اللقا ما دامشى

قمر الليالى ها يروح لفين  
وانا لسه عندى ياليل يا عين  
جوايا غنوة للكون بحاله  
توصف جماله ف كلمتين  
أنا عايزة أسهر هنا ما انا مشى  
مش عايزة أمشى  
الحب لسنة ف قلبى دايم  
وليه يا قلبى اللقا ما دامشى

أنا عندى غنوة عن حب غايب  
وعيون بتعشق وقلب دايب

وعندى معنى باحسه لكن  
ما اقدرش اقوله غير للحبايب  
أنا عايزة أسهر هنا ما انا مشى  
مش عايزة أمشى  
الحب لسسة ف قلبى دايم  
وليه يا قلبى اللقا ما دامشى

---

(\*) لحن: محمد على سليمان .

غناء: ريهام عبدالحكيم.

فازت هذه الأغنية بجائزة الميكرفون الذهبى فى مسابقة الأغنية العربية التى ينظمها اتحاد الإذاعات العربية.

---

## أحب أحب (\*)

الدنيا دروب .. مليانة قلوب  
قاسية ومش راسية على المحبوب  
وانا ف الدنيا دى باحب أحب  
وأحب اتحب  
وأحب أعيش ف ليالى القرب  
إنشالله ياخذنى العشق وادوب  
إنشالله أدوب

الدنيا مفارق فيسها فراق  
بعد الأشواق  
وانا روح تشتاق توصل لحبيب  
ماتفارق هوش  
يدينى أمانى وما حرم هوش ..  
حلم الطيران  
أو حلم الغنا فوق الأغصان  
داانا ف الدنيا دى باحب أحب  
واحب اتحب

الدنيا براح .. وانا قلبى براح  
مش عايزة جراح

أنا عايذة صباح يقابلنى بصدق  
مااكدهوش  
يقابلنى الكذب مااصدقهوش ..  
وأطير طيران  
واسقيك الندى والندى فرحان  
داناف الدنياى باحب أحب  
واحب أحب

---

(::) لحن: أحمد الحجار .

غناء: أنغام.

---

## ملك ايديك (\*)

دوبنى انا ملك ايديك  
وحياتى منك وإليك  
كل منايا تبقى معايا  
وأشوف الأحلام بعينيك

أيامنا تواعد أحلامنا  
ونفارق خوفنا وأوهامنا  
ونحب ونصبح شىء واحد  
وبنحضن صمتنا وكلامنا  
كل منايا تبقى معايا  
وأشوف الأحلام بعينيك

مطرح ماخىالى يودينى  
ألاقيك مستنى تهينى  
تحلالى الدنيا وعيونك  
من شهد الحب بتسقينى  
كل منايا تبقى معايا  
وأشوف الأحلام بعينيك

(\*) لحن: إحسان المنذر .

غناء: غادة رجب .

## غنوتنا كانت

غنوتنا كانت أحلى الأغاني .. وكان غرامنا شمس الأصيل  
إيه اللي باقى م العمر تانى .. لو كان لقانا بقى مستحيل  
الكلمة كانت معنى وطريق .. والنغمة كانت إحساس مضى  
وانا وانت كنا غنوة محبة .. يعزفها قلب الندى البرى  
هات الأمنى .. واسعد زمانى .. دا انت اللي حبك مالهوش بديل  
إيه اللي باقى م العمر تانى .. لو كان لقانا بقى مستحيل  
إحساسى ضايع والضى محنى .. والبعد بعد الوصال جرحنى  
ياأحلى غنوة ف العمر كله .. صوتك حبيبي ساكن ف لحنى  
صوتك بيملا قلبى وكيانى .. والحب تايه وانت الدليل  
إيه اللي باقى م العمر تانى .. لو كان لقانا بقى مستحيل